

Сийрат дарслари (29-дарс)

СИЙРАТ
дарслари 29-дарс

Сийрат дарслари Шайх Мұхаммад Содиқ Мұхаммад Юсуф роҳимаҳуллоҳнинг
«Бу – Расулуллоҳ соллаллоҳу алайҳи васаллам» таржима китоблари ва
“Ҳадис ва ҳаёт”нинг 19-жузъи асосида бериб борилади. Мавзуларнинг тўлиқ матни
 билан танишиш учун китобнинг ўзига мурожаат этиш тавсия этилади.

13:30 / 20.04.2019 3817

169. Усома ибн Зайд розияллоҳу анҳудан ривоят қилинади:

«Бадр воқеасидан сал олдинроқ Расулуллоҳ соллаллоҳу алайҳи васаллам фадакий чопонни солиб, эшакка миндилар. Орқаларига Усома ибн Зайдни мингаштириб, Бану Ҳорис ибн Ҳазраж(қавми)га Саъд ибн Убодани кўргани бордилар. У зот Абдуллоҳ ибн Убай ибн Салул ўтирган мажлисдан ўтдилар. Бу, Абдуллоҳ ибн Убай Исломга киришидан олдин бўлган эди. Мажлис мусулмонлар, мушриклар, бутпарамастлар, яҳудийлардан иборат – аралаш эди. Ўша мажлисда Абдуллоҳ ибн Равоҳа ҳам бор эди. Ҳайвон тўзитган чанг мажлисга етиб борганда Абдуллоҳ ибн Убай бурнини ридоси билан тўсади ва: «Чангитмасанглар-чи!» деди. Расулуллоҳ соллаллоҳу алайҳи васаллам уларга салом бердилар. Тўхтаб, тушдилар ва уларни Аллоҳга чақириб, Қуръон ўқиб бердилар. Шунда Абдуллоҳ ибн Убай ибн Салул: «Ҳой одам! Агар айтаётганинг ҳақ бўлганда ҳам, яхшилиги йўқ. Мажлисимизда бизга озор берма. Юкинг олдига қайт. Ким олдингга борса, ўшанга қиссангни айт», деди. Абдуллоҳ ибн Равоҳа эса: «Эй Аллоҳнинг Расули, мажлисларимизга (ваъз билан) келиб туринг, биз буни яхши кўрамиз», деди.

Шунда мусулмонлар, мушриклар ва яҳудийлар сўкишиб кетишиди. Уришиб кетишлирага оз қолди. Набий соллаллоҳу алайҳи васаллам ҳай-ҳайлаб юриб, зўрға тинчитдилар. Сўнгра Набий соллаллоҳу алайҳи васаллам уловларини миниб юриб кетдилар. У зот бориб, Саъд ибн Убоданинг олдига

кирдилар. Набий соллаллоху алайҳи васаллам унга: «Эй Саъд! Абу Ҳабобнинг (Абдуллоҳ ибн Убайнинг) нима деганини эшитдингми? Бундай-бундай деди», дедилар. Саъд ибн Убода: «Эй Аллоҳнинг Расули, уни афв этинг ва кечиринг. Сизга Китобни туширган Зот ила қасамки, Аллоҳ сизга нозил қилган ҳақни келтирганда ушбу ернинг аҳли унга тож кийдиришга ва салла ўратишга келишган эди. Аллоҳ сизга берган ҳақ билан буни истамагандан кейин у бунга ҳасад қилди. Шунинг учун, сиз кўрган нарсани қилган», деди. Шунда Расулуллоҳ соллаллоху алайҳи васаллам уни афв қилдилар. Расулуллоҳ соллаллоху алайҳи васаллам ва у зотнинг саҳобалари мушриклар ва аҳли китобларни Аллоҳ уларга амр қилганидек афв этар ва озорларига сабр қиласар эдилар. Аллоҳ азза ва жалла айтган: «Албатта, сиздан олдин китоб берилганлардан ва ширк келтирганлардан кўплаб озор эшитасиз». Ва Аллоҳ: «Аҳли китоблардан кўплари уларга ҳақ равшан бўлганидан кейин ўзларича ҳасад қилиб, сизларни иймонли бўлганингиздан кейин кофириликка қайтармоқчи бўладилар», деган.

Набий соллаллоху алайҳи васаллам Аллоҳ у зотга амр қилганидек афв қиласар эдилар. Аллоҳ Бадрда у зот ёрдамида Қурайшнинг кофири катталарини қатл этганда Ибн Убай ибн Салул ва у билан бирга бўлган мушриклар ва бутпарамастлар: «Бу иш бўй кўрсатиб қолди. Расулуллоҳ соллаллоху алайҳи васалламга Ислом байъати қилинглар», деб мусулмон бўлишди».

Бухорий ва Муслим ривоят қилишган.

«Бу - Расулуллоҳ соллаллоху алайҳи васаллам» китобидан